



## FIELDAT.....

Fieldat ta duna hende siguransa i felisidat. Fieldat ta base pa tur amor, amistad i konvivensia di hende. Meskos ku amor, fieldat ta un desishon: ami lo ta fiel na bo. Esaki ta loke mayornan ta bisa nan yunan i loke hende hòmbèr i hende muhé ta bisa otro, ora nan disidí di bai biba huntú. Ser fiel ke men: ku por konta ku otro semper, bou di tur sirkunstansia. E yunan mester sinti ku nan mayornan ta hasi sierto kos òf laga, pa nan bienestar. Un hende fiel ta manera baranka den awa brutu pa hendenan ku tin mesté di su sosten. Fieldat ta sirbi otro, ta duna na otro. Fieldat ta: no purba enrikesé bo mes riba lomba di otro hende, ma sirbi e otro pa e enrikesé. Fieldat mester por krese entre hende. E lo no por krese kaminda tin deskonfiansa, kaminda tin kònkèlmentu òf kaminda ta skonde kos pa otro. Fieldat ta konfiansa. Entregábo manera realmente bo ta, sin temor. No manera lo bo gusta di ta, òf manera e otro persona lo gusta mirabu. Laga e hende sinti ku bo ta konfi'é konstantemente i dun'é motibu tambe pa meresé bo konfiansa. Fieldat ta, ser sinsero, bisa otro bèrdat, maske e bèrdat ei ta marga. Fieldat ta, apesar di kualke frakaso, no bira lomba p'e. Fieldat ta, ser dispuesto pa kuminsá di nobo ku bo próhimo i buska aserkamentu, tambe ora situashon ta difísil. Fieldat i konfiansa ta duna espasio na otro i habri kaminda pa futuro.



*fieldat i bèrdat manera un kadena na bo garganta, graba nan den bo mente. (Proverbionan 3:3)*

*Pero loke Spiritu di Dios ta generá den hende ta amor, goso, pas, pasenshi, amabilidad, bondat, fieldat (Galatanan 5:22)*

### Pikanan Kontra Spiritu Santu

- Di ki tipo di piká nos ta papia aki?
- desperashon pa ser salvá
  - no kere den e bèrdat ku ta konosí
  - envidia òf duele di grasia di otro
  - pikánan relashoná ku shelu

- suicido
- oprímí pobènan, viudanan òf huérfanonan

Esakinan i mas ta pikánan pa kua no tin salbashon. Den Santa Skritura nos ta lesa: “Ma esun ku blasfemá Spiritu Santu lo no haña pordon nunca mas; lo e keda kulpabel pa semper.” (Mk. 3,29, Mt. 12,32, Lk. 12,10) Awor dikon e blasfemia kontra Spiritu Santu ta algu ku no por ser pordoná? Ora nos peka kontra Spiritu Santu, esaki ta un forma di rechasá e grasia ku Dios ta ofresé nos pa por konbertí nos mes. Blasfemia kontra Spiritu Santu ta komo si fuera nos ta buska pa konservá tur loke ta malu. E ta manera un opstinashon kontra Dios ku ta bai te final. E ta un forma di ninga deliberadamente di risibí e misericòrdia dibino. Katesismo di Iglesia Katolika ta bisa na 1864:



Misericòrdia di Dios no tin límite, pero esun ku ninga di un manera deliberá pa risibí e misericòrdia di Dios pa medio di arepentí di piká, ta rechasá e pordon di su pikánan i e salbashon ku Spiritu Santu ta ofresé. Esaki lo por hiba nos na kondena final i pèrdishon pa semper.

Peka kontra Spiritu Santu ta konsistí pues den, e echo ku un persona ta ninga na aseptá salbashon i pordon di Dios. Ora kurason di un hende ta opstiná di tal forma ku e no ta aseptá ku e mester arepentí di su pikánan i ku e ta resistí e grasia aki, e persona ei ta kometé un piká kontra Spiritu Santu ku lo por pone ku e ta bai fièrnu. Dikon?

No pasobra Iglesia òf Dios no por pordon'é, al kontrario, sino pasobra e persona aki mes, di un forma boluntario a rechasá e pordon i salbashon aki ku Dios ta ofresé.

Papa Huan Pablo II den su ensíklika tokante Spiritu Santu ta splika e piká aki di e siguiente forma:

“E blasfemia aki no ta konsistí den e echo di a ofendé Spiritu Santu ku palabra, pero mas bien e ta konsistí den e rechazo na aseptá e salbashon ku Dios ta ofresé na hende pa medio di Spiritu Santu.” Manera Papa Huan Pablo ta splika, e piká kontra Spiritu Santu ta konsistí di resistensha i rechazo na kombershon. Ta netamente Spiritu Santu ta esun ku ta kombensé nos di piká (Hn.16,8-9). Si nos ta rechasá e realidat aki den nos kurason i nos ta opstiná nos mes den kosnan malu, esakinan ta hiba nos na pika. Esaki tabata e akstitut di e fariseonan, ku a sera nan mes kontra e aseptashon di e plan dibino pa rekonsiliá nos mes ku otro.